

Den caso cu prome minister Eman wordo incapacita

‘Mike de Meza lo bira prome minister interino’

ORANJESTAD — Minister Mike de Meza di Asuntonan Economico lo haya encargo di ministerio di Asuntonan general y bira prome minister interino, si acaso prome minister Mike man keda incapacita of fayece pa via di su welga di hamber.

Bon Dia Aruba a haya di compronde diasabra anochi na Fort Zoutman cu esaki a wordo dicidi den Consejo di Minister. Ayeranochi minister De Meza mes a confirma esaki na Bon Dia Aruba. Mientras tanto, prome minister Eman a mustrandó bon ainda, pero cu forsa menguante den su di dos dia sin come.

Minister De Meza ta confirma cu e lo bira prome minister interino. Pero di bi-aha el a purba desvia topico, contando Bon Dia Aruba cu ya caba hopi organisacion na diferente pais a muestra sosten na prome minister Eman y su accion di welga di hamber. Entre otro Organización Demócrata Cristiana de América (ODCA), cu ta acapara treinta partido cristian democrata den region y cu tin su cede na Mexico a anuncia cu nan ta sostene accion y e causa di prome minister Mike Eman su welga di hamber. De Meza ta bisa tambe cu el a haya di compronde cu figuranan politico na Washington tambe lo muestra nan apoyo den diano cu ta bin. Mientras tanto antayera a lanta un accion di firma pa e asina yama ‘mocion di pueblo’. Idea tras di esaki ta pa manda e peticion aki pa kita e aanwijzing y pone gobernador firma e presu-puesto pa Hulanda. A puntra cuanto hende a firma caba, pero e juffrouw atendiendo e



firmanan a bisa cu awo no tin manera pa sa pasobra na otro localidadnan na Aruba tambe ta colectando firma.

Ambiente cariñoso pero preocupa

Pa loka ta e welga di hamber mes, manera conoci prome minister Eman ta wordo controla dor di personal di ambulance riba entre otro nivel di sucu den su sanger. Mester bisa si cu e prome mandatario ta kedando hopi mas den su tent den cual e ta drumi, y den ‘vez en cuando’ ta sali pa saluda su sigui-donan y combersa cu nan. Ayeranochi Bon Dia Aruba a yega net na ora pa mira pas-tor Jairo Maduro sali for di e tent. Poco despues Eman mes a sali. E tabata muestra di tin hopi menos energia, pero toch basta bon na pia. Sostenedor nan, hopi di nan cu nan yiu den man of den stroller a para den rij pa nan lider saluda y brasa nan. E ambiente tabata uno di hopi cariño y por a mira prome minister Eman sacando extra energia for di tur e calor humano aki. Por a nota un ambiente hopi cariñoso, den



cual lider di partido y prome minister Eman tabata wordo trata casi manera un santo, pero den mesun rosea por a nota cu tin hopi preocupacion pa loka ta estado fisico di prome minister. Tabata parece cu notando Eman su deterio-ro fisico, e seriedad y reper-cusionnan di e accion a cum-insa wordo comprondi pa e militancia di partido berde cu tabata presente. Bon Dia Aruba a haya chens pa puntra prome minister Eman con e tabata sinti. “Mas o menos, mi ta cuminsa sinti un tiki menos fuerte si”, e prome minister di Aruba a admiti.



Ora cu a dun’e un man, por a nota cu berdad su forsa a disminui seriamente den ultimo 48 oranan.

Dialuna of diamars

Minister Alex Schwengle a conta Caribisch Netwerk antayera nochi cu como dok-ter y esun na mando pa loka ta monitoring di condicion medico di prome minister e ta preocupa. Eman lo ta be-biendo y tumando su elec-trolytes bon, pero su salud ya caba a cuminsa muestra señalnan di deterioro. Riba dje e no a descansa of come mucho bon de ultimo siman-

nan pa via di entre otro nego-ciactionnan cu prome minis-ter di Hulanda Mark Rutte den oranan laat di marduga. Un welga di hamber ta algo hopi serio cu Schwengle a desconsheha e prome manda-tario. “E ta algo sumamente malo pa bo salud. E por mata bo obviamente y ta haci daño na bo musculonan y nervi-onan. Tambe e por haci bo curason mas zwak.” Un peli-ger hopi serio ta si diripiente ta perde electrolytes. Esaki lo por conduci na fayecimento di prome mandatario. E clima di Aruba ta asina cu Schwen-gle ta anticipa cu pa awe of mañan situacion lo por cum-insa bira critico pa prome minister Eman. “Mientras cu e tin su facultadnan na ordo y por tuma decision, e deci-sion ta keda na e pa sigui of no, y conociendo Mike, mi ta mir’e como un persona cu no ta para pa loco. E no ta rindi. Pero mi a bis’e si cu si na dado momento cos bay malo y e no ta coherente mas, ami lo tuma decision pa para e welga, pasobra ami tin cu cumpli cu mi huramentacion como dokter”, asina minister Schwengle ta splica. □